



ODBOJKAŠKI SAVEZ BOSNE I HERCEGOVINE
VOLLEYBALL FEDERATION OF BOSNIA AND HERZEGOVINA
Affiliated in FIVB



K O D E K S

**PONAŠANJA U ODBOJKAŠKOM SAVEZU BOSNE I HERCEGOVINE
(PREČIŠĆENI TEKST)**

Sarajevo, avgusta/kolovoza 2013. godine

Na temelju članka 21. Statuta Odbojkaškog saveza Bosne i Hercegovine i članka 1.1.1. Kodeksa ponašanja FIVB, Skupština OS BiH, na sjednici održanoj 25.04.2009. godine i 30.08.2013. godine, utvrdila je

K O D E K S

ponašanja u Odbojkaškom savezu Bosne i Hercegovine

(prečišćeni tekst)

1. Opće odredbe

1.1 Ovim Kodeksom se definiraju etičke norme ponašanja u odbojkaškoj organizaciji Bosne i Hercegovine.

Kodeks je obvezujući za članove svih tijela OS BiH, regionalne odbojkaške asocijacije, klubove, odbojkaše-ice, odbojkaška udruženja, odbojkaške stručnjake, odbojkaške stručne radnike i druge osobe koje se dragovoljno učlane u odbojkaške organizacije radi ostvarivanja zajedničkih interesa u oblasti odbojkaškog sporta i prihvate Statut Saveza (u daljem tekstu: odbojkaški subjekti).

1.2 Djelovanje u odbojkaškom sportu zasnovano je na osnovnim etičkim principima i dostojanstvu svih odbojkaških subjekata u Bosni i Hercegovini, i na načinu dobrog i prihvatljivog ponašanja.

1.3 Odbojkaški subjekti će svoje djelovanje zasnivati na organiziranju i bavljenju odbojkom u cilju daljeg unaprijeđenja igre i podizanja kvalitete, u skladu sa Međunarodnim pravilima igre i normativnim aktima Odbojkaškog saveza Bosne i Hercegovine.

1.4 Odbojkaški subjekti su obvezni štiti dostojanstvo, integritet i cjelovitost organizacije u svim odnosima.

2. Dostojanstvo

2.1 Dostojanstvo svakog pojedinca u organizaciji mora biti sačuvano.

2.2 Ne smije biti diskriminacije na rasnoj, nacionalnoj, kulturnoj i vjerskoj osnovi, po spolu, na osnovu bračnog statusa, i različitog mišljenja.

2.3 Ne smije biti zlostavljanja: moralnog, fizičkog, mentalnog, profesionalnog, ni bilo kojeg drugog oblika.

2.4 Odbojkaški subjekt ne smije klevetati, vrijeđati, etiketirati, podmićivati, širiti neosnovane optužbe, neprovjerene informacije i neistine.

3. Integritet

- 3.1 Međusobni odnosi tijela u Savezu su regulirani normativnim aktima i oni se ne mogu mijenjati osim po predviđenoj proceduri.
- 3.2 Dužnost svakog odbojkaškog subjekta je braniti sportska načela i principe fer pleja i svojim ponašanjem ne dovoditi do njihove povrede.
- 3.3 Svi odbojkaški subjekti mogu primati i davati naknadu i ostvarivati korist, samo u skladu sa utvrđenim pravilima.
- 3.4 Odbojkaški subjekti ne mogu negativno govoriti ili djelovati u odnosu na druge odbojkaške subjekte, druge sportove i državna tijela i institucije.
- 3.5 U odnosima sa drugim odbojkaškim organizacijama ne može se nastupati sa pozicije narušavanja cjelovitosti Odbojkaškog saveza Bosne i Hercegovine.

4. Sukob interesa

- 4.1 Odbojkaški subjekti ne mogu opće interese odbojkaške organizacije podrediti pojedinačnim i vlastitim interesima. Ne smije se koristiti odbojkaška organizacija za postizanje osobnih interesa izvan odbojkaške organizacije.
- 4.2 Pojedinac, izabran na odgovarajuću funkciju u organima Odbojkaškog saveza Bosne i Hercegovine, dužan je povjerenu mu dužnost obavljati maksimalno ozbiljno i u skladu sa aktima saveza.
Ni jedna osoba u odbojkaškoj organizaciji ne može obavljati nespojive dužnosti. Nespojivo je da članovi Upravnog odbora Odbojkaškog saveza Bosne i Hercegovine budu imenovani u stalna radna tijela i na inokosne dužnosti iz nadležnosti odlučivanja Upravnog odbora Odbojkaškog saveza Bosne i Hercegovine.
Nespojive su istovremene dužnosti u klubovima: predsjednik kluba, direktor kluba, tajnik kluba, trener i sl.
Nespojive su dužnosti službenih lica sa lista za stalna takmičenja sa dužnostima u odbojkaškim klubovima, bez obzira na rang takmičenja.
- 4.3 Članovi organa i stalnih radnih tijela u Odbojkaškom savezu Bosne i Hercegovine i službena lica sa lista za stalna takmičenja ne mogu davati prednost svom angažovanju u drugim sportovima i sportskim savezima.
- 4.4 Član tijela u odbojkaškoj organizaciji ne smije zlorabiti ovlaštenja koja proističu iz funkcije koju obavlja, niti smije svoj angažman podrediti osobnom interesu ili interesu nekog drugog člana organizacije na štetu drugih odbojkaških subjekata.

5. Međusobni odnosi pojedinaca i organa u OS BiH

- 5.1 Zabranjeno je podstrekavati sportaše na uzimanje droga i drugih stimulativnih sredstava radi postizanja boljih rezultata. Odbojkaškim sportom u Bosni i Hercegovini ne mogu se baviti uživaoci droga i registrirani narkomani.

5.2 Zabranjeno je lobiranje prilikom prelazaka odbojkaša i odbojkašica iz kluba u klub, miješanje u politiku rukovođenja drugim klubom, potpisivanje predugovora i ugovora sa odbojkašem-icom koji su pod ugovorom sa drugim klubom, ili su pod disciplinskom mjerom tog kluba, bez predhodnog dogovora sa matičnim klubom.

Bez suglasnosti kluba sa kojim je odbojkaš-ica ili trener pod ugovorom, nije dopušteno bilo kakvo njihovo prisustvo i angažiranje u drugom klubu.

5.3 Odbojkaši i odbojkašice mlađi od 18 godina ne smiju biti "vrbovani", niti smiju potpisivati dokumente (ugovore) u odbojkaškim organizacijama bez prisustva i suglasnosti roditelja ili staratelja. Istovremeno, njima se ne smiju nuditi lažna obećanja i predstavljati iskrivljena slika odbojkaške organizacije u vrijeme prijelaznog roka, a ni poslije toga.

5.4 Odbojkaški treneri su se dužni pridržavati općeg etičkog kodeksa što podrazumijeva:

- obvezu plasiranja istinitih činjenica u komunikaciji,
- zabranu unošenja osobnih problema u međusobne odnose i izazivanje konflikata,
- zabranu zlouporabe trenerskog autoriteta i stvaranja eksploatatorskog odnosa,
- obvezu izgradnje moralnih vrijednosti i sposobnosti za pravilno rasuđivanje.

Trener je obavezan u javnim istupima i prilikom davanja izjava uvažavati sve moralne, socijalne, mentalne, dobne, religiozne i spolne razlike. U javnom pojavljivanju, svojim profesionalnim odnosom i osobnim primjerom, mora biti uzor kako na sportskom tako i na pedagoškom planu.

Prilikom učenja odbojkaškim vještinama trener prema odbojkašu-ici mora djelovati odgojno i izgrađivati pozitivne moralne odnose u klubu, eliminirati sve vidove protekcionizma i familijarnosti, uz zabranu svih oblika fizičkog, verbalnog i emocionalnog nasilja. Na treninzima i utakmicama dužan je poticati i razvijati individualne kvalitete odbojkaša-ice prilagođavajući ih kolektivnim potrebama kluba.

U sankcioniranju neprimjerenog ponašanja i vladanja odbojkaša-ica mora biti realan i primjenjivati pravila koja to sankcioniraju, a propisana su od strane kluba. U takve situacije ne smije unositi subjektivizam i osobni odnos.

Za nastupe ekipe u bilo kojoj kategoriji trener je dužan biti objektivan i odabir ili selekciju izvršiti na bazi stvarnih sportskih i moralnih kvaliteta odbojkaša-ica.

Trener je obavezan pridržavati se etičkog kodeksa i pedagoških standarda u svim prilikama, bilo da se radi o službenoj ili neslužbenoj situaciji. Istovremeno je obavezan prijaviti sve vidove kršenja etičkog kodeksa u ekipi, klubu i nekoj drugoj odbojkaškoj organizaciji.

5.5 Službene osobe (suci, delegati, kontrolori), pored pridržavanja osnovnih etičkih principa sadržanih u ovom kodeksu, obvezni su:

- stalno raditi na profesionalom obrazovanju, usavršavanju vlastitih znanja i umijeća suđenja i na taj način, kompetentno biti odgovorni za svoj posao,
- raditi na vlastitom izgrađivanju sebe kao cjelovite ličnosti, maksimalno poznajući odbojkaški sport sa svim specifičnostima, štiteći tako integritet svoje

ličnosti i odbojkaškog sporta,

- stalno izgrađivati profesionalnu odgovornost prilikom obavljanja službene dužnosti. Službene osobe su dužne djelovati timski u svim situacijama i maksimalno profesionalno,
- časnim i iskrenim pristupom obavljanju službene dužnosti moraju steći povjerenje sudionika u odbojkaškoj utakmici, te svojim ponašanjem u neslužbenim situacijama steći poštovanje sredine u kojoj su,
- u okviru službene nadležnosti, službene osobe moraju pomagati drugim sudionicima u odbojkaškoj utakmici ne izlazeći iz okvira pravila igre i službenog odbojkaškog protokola.

- 5.6** Članovi odbojkaške organizacije su se (ako su nezadovoljni radom tijela Saveza) obvezni obratiti nadležnim tijelima odbojkaške organizacije i pravovremeno ukazati na nepravilnosti u radu tijela i pojedinaca.
- 5.7** Odbojkaški subjekt ima pravo zatražiti informaciju od nadležnog tijela po svim pitanjima funkcioniranja odbojkaškog sporta.
- 5.8** Radna tijela u odbojkaškoj organizaciji dužna su osigurati pristup javnosti u svom radu, a svi rezultati rada podložni su sudu javnosti.
- 5.9** Odbojkaški subjekt ne smije i neće snositi posljedice ako je na primjeren način ukazao na nepravilnosti u radu tijela ili pojedinaca.
- 5.10** Svađe, tuče, nasilje, nedolično i nesportsko ponašanje na odbojkaškom terenu ili u gledalištu ne mogu se tolerirati i veličati. Dužnost je svakog odbojkaškog subjekta navedene pojave spriječiti.
- 5.11** Klub je odgovoran za ponašanje, suradnju i izgrađivanje sportskog duha kod navijača.

Navijači ne smiju nesportski navijati i vrijeđati sudionike u natjecanju i ostale prisutne na odbojkaškim utakmicama i manifestacijama.

6. Prijelazne odredbe

- 6.1** Član odbojkaške organizacije, a posebno član tijela, ne smije se ponašati kao neovisan pojedinac, već kao pripadnik jedinstvene odbojkaške organizacije koja djeluje u pravcu unaprijeđenja i razvoja odbojkaškog sporta u cjelini.
- 6.2** Član odbojkaške organizacije, a posebno član tijela, dužan je svojim djelovanjem upozoriti i spriječiti činjenje ili nečinjenje koje za posljedicu može imati narušavanje ugleda odbojkaške organizacije.
- 6.3** OS F BiH i OS RS, kao i svi odbojkaški klubovi dužni su u roku od 90 dana usaglasiti vlastite kodekse ponašanja i druge akte sa ovim kodeksom.
- 6.4** Ponašanje odbojkaških subjekata koje je u suprotnosti sa odredbama ovog kodeksa disciplinski se sankcionira u skladu sa aktima Saveza.

6.5 Odredbe ovog kodeksa važe za sve odbojkaške subjekte u Odbojkaškom savezu Bosne i Hercegovine od dana usvajanja.

6.6 Tumačenje odredbi Kodeksa daje Skupština Odbojkaškog saveza Bosne i Hercegovine.

Broj: 01/1-465/13
Datum, 30.08.2013. godine



PREDSJEDNIK
Milutin Popović, s.r.